

**Terima kasih Tun Dr Mahathir atas jasa kepada negara - Muhyiddin Yassin
AstroAwani
02 Mac 2020
Nursyazwani Saiful Sham,**

KUALA LUMPUR: Perdana Menteri, Tan Sri Muhyiddin Yassin merakamkan ucapan terima kasih kepada Tun Dr Mahathir Mohamad yang telah banyak berjasa kepada negara.

Dalam ucapan pertama kali beliau sebagai Perdana Menteri, Muhyiddin menyeru agar rakyat Malaysia memberikan sokongan padu buat beliau untuk memikul tanggungjawab itu.

“Berilah saya peluang untuk memanfaatkan 40 tahun pengalaman saya dalam politik dan kerajaan untuk mengemudi Malaysia ke arah kegemilangan.

“Berikan saya sedikit masa untuk menetapkan garis-garis utama hala tuju kerajaan dan negara di bawah pentadbiran baharu ini yang insyaAllah akan saya jelaskan kepada rakyat dalam masa terdekat.

“Saya mengucapkan jutaan terima kasih kepada saudara dan saudari yang telah menghadapi kemelut yang melanda negara dengan sabar dan tenang,” katanya.

Beliau pada masa yang sama mengajak rakyat Malaysia untuk bersama-sama membina semula negara dan kembalikan kegemilangan negara ini.

“Saya adalah Perdana Menteri untuk semua rakyat Malaysia dari Perlis hingga ke Sabah. Baik saudara orang Melayu, saudara orang Cina, saudara orang India, Sikh, Iban, Kadazan, Dusun, Murut, orang asal, atau apa jua kaum dan etnik, saya adalah Perdana Menteri saudara.

“Sama ada saudara adalah petani, saudara nelayan, saudara peniaga, saudara penjawat awam, saudara pekerja swasta, saya adalah Perdana Menteri saudara,” jelasnya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/terima-kasih-tun-dr-mahathir-atas-jasa-kepada-negara-muhyiddin-yassin-232340>